



Komunikadu Imprensa
04 Abril 2024

**Partisipante sira treinamentu foin hatene kona-ba lala'ok krime públiku
no semi públiku depoisde simu informasaun hosi JSMP**

Iha 19 Marsu 2024, JSMP fahe informasaun kona-ba asesu ba iha justisa formál ba estrutura Aldeia no mós comunidade sira iha aldeia Uai-Tunau, Suku Uma-Ana-Iku, Postu Administrativu Venilale, Munisípiu Baukau.

Dezaminasun informasaun ne'e realiza ho objetivu atu hasa'e koñesimentu estrutura aldeia no comunidade sira-nian kona-ba oinsá asesu ba justisa formál no asegura rezolve kazu disputa sira no seluk tan iha aldeia ho baze tuir lei formál sira ne'ebé vigora ona.

“JSMP kontente bele realiza atividade ne'e ba autoridade lokál iha nivel aldeia no comunidade sira, nune'e bele hasa'e comunidade sira nia koñesimentu kona-ba prosesu justisa formál. Atividade ida ne'e mós hanesan parte ida hosi atividade sira seluk tuir akordu Nota Entendimentu (MoU) entre Suku Uma-Ana-Iku ho JSMP iha Programa Apoiu Seguransa komunitáriu (PASK) hodi responde ba saida mak sai hanesan preokupasaun ne'ebé xefe aldeia sira no comunidade sira infrenta durante ne'e liga ho justisa,” dehan Sra. Ana Paula Marçal, Diretora Ezekutiva JSMP.

Materia iha treinamentu ne'e kompostu hosi definisaun kona-ba lei, definisaun krime, tipu krime, natureza krime, ho ninia pena no mós prosedimentu ba iha kazu krime no sivíl iha prosesu justisa formál. Alende ne'e, esplika mós kona-ba papél estrutura aldeia sira bainhira akontese disputa ruma iha aldeia. Iha ikus, ekipa JSMP mós fahe kona-ba serbisu rede referral nian iha assisténsia legál ba vítima feto no labarik.

Depoisde rona tiha apresentasaun matéria hosi JSMP, partisipante balun hato'o sira ninia preokupasaun kona-ba implementasaun Lei Kontra Violénsia Doméstika (LKVD) ne'ebé mak autoriza ema seluk bele hato'o keixa bainhira mosu kazu baku malu entre feen ho la'en (konsidera hanesan bikan ho kanuru mak tarutu).

Hatan ba preokupasaun sira ne'e, JSMP esplika katak depoisde Lei Kontra Violénsia Doméstika tama iha vigor, krime ne'ebé envolve feen ho la'en, eis feen ho eis la'en ka ho ema seluk ne'ebé hela hamutuk iha uma laran no bainhira iha dependénsia ekonómia, inan-aman hasoru oan no oan hasoru inan aman konsidera hanesan krime públiku, nune'e ema se de'it bainhira hatene kona-ba akontesimentu ne'e bele hato'o keixa ba polísia ka ministériu públiku no ninia prosesu to'o tribunál mak foin bele hotu. Mezmu nune'e la taka dalan atu rezolve iha suku ka liuhosi dalan família ka kulturál maibé ninia prosesu tenke la'o nafatin to'o hetan desizaun hosi tribunál.

Iha parte seluk, partisipante seluk hato'o sira preokupasaun kona-ba lideransa suku balun prezensa iha fatin akontesimentu krime (la'en baku feen) maibe lideransa sira haree de'it no la ba hato'o keixa. Ita hatene katak kazu ne'e konsidera hanesan krime publiku. oinsa ho sira nia serbisu.

Hatan ba preokupasaun ne'e JSMP esplika katak, bainhira kazu sira ne'e akontese iha komidade mak autoridade balun iha oin no kualker komidade balun haree bele ba hato'o keixa, se bainhira autoridade sira iha hotu fatin akontesimentu sira iha dever atu ba hato'o keixa, tanba sira nia knaar ida mak atu halo prevensaun ba iha kazu sira hanesan ne'e.

Preokupasaun tuir mai kona-ba direitu ba familia liuliu hanesan eransa. Rikeza inan-aman, serake oan feto mos iha direitu ka la'e. Lei fo direitu ba oan feto hotu ka lae? tanba ko'alia kona-ba kultura oan mane mak sempre iha poder liu oan feto,

Hatan ba preokupasaun ne'e, JSMP esplika katak ko'alia kona-ba eransa iha lei inan Konstituisaun RDTL ko'alia kona-ba feto no mane iha direitu hanesan no iha ita ninia Kodigu Sivil mos regula kona-ba feto ka mane iha direitu ne'ebe hanesan ba eransa hosi inan-aman.

Xefe aldeia Uai-Tunau, Sr. Ponciano da Costa Belo iha ninia intervensaun haktuir katak nu'udar xefe aldeia ne'ebe mak foin eleitu kontente tebes ho serbisu hamutuk entre Suku Uma-Ana-Iku ho JSMP, tanba hosi serbisu hamutuk ne'e bele ajuda komidade sira ne'ebe infrenta kazu sira. Alende ne'e, bele hasae ami nia koñesimentu kona-ba krime publiku no krime semi publiku, tanba ami (ha'u rasik ho komidade) iha aldeia ne'e foin primeiraves tuir treinamentu kona-ba asesu ba justisa no konsidera treinamentu ne'e foun ba ami no antes ne'e kazu sira ne'e akontese iha ami ninia komidade liuliu entre feen ho la'en, maibe ami la hato'o keixa tanba la hatene hahalok ne'e krime ka lae no la hatene nia prosesu oinsa atu apresenta keixa. Depoisde tuir treinamentu foin komprende katak hahalok ne'e krime publiku no bainhira hatene kona-ba akontesimentu ema se de'it bele hato'o keixa.

Partisipante ne'ebe partisipa iha deseminasaun informasaun ne'e hamutuk ema na'in 34 ne'ebe kompostu hosi feto na'in 16 no mane na'in 18. Partisipante sira ne'e kompostu hosi Xefi Aldeia, lia na'in Aldeia, Katuas Uma-Lisan ,delegadu/a, Ema ho defisiensia, Veterano, Representa Arte Masiais no mos komidade balun.

Atividade ne'e realiza hosi JSMP liuhosi Programa Apoiu Seguransa Komunitariu (PASK), tanba serbisu hamutuk ho The Asia Foundation (TAF) ne'ebe finansia hosi Embaixada Nova Zelandia iha Timor – Leste.

Atu hetan informasaun kompleitu, favoer kontaktu:
Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl